

SEJARAH TAMPIN

Sebuah kisah orang tua-tua menyebut orang yang mula-mula meneroka Tampin ialah satu pasukan perompak laut seramai 70 orang yang diketuai oleh Panglima Hitam, suku Batu Hampar. Tempat yang bernama Keru dan Tebong dekat Tampin sekarang mula dibuka oleh seorang suku Mungkal yang datang dari Mancap di Melaka. Tempat yang bernama Repah itu pula mula dibuka oleh orang-orang suku Batu Tiga, tetapi cerita yang disebutkan ini tiada mempunyai tarikh dan bukti yang nyata.

Sejarah Tampin telah dibuktikan kebenarannya pada 28 Januari tahun 1832. Datuk Undang Rembau yang bernama Datuk Nganit (Undang Rembau yang ke-13, 1819 — 1838) telah membuat surat perjanjian dengan orang Inggeris di Melaka. Undang Rembau itu telah menyerahkan Tampin kepada Syed Shaaban, menantu Raja Ali. (Raja Ali ini anak saudara kepada Raja Asil bin Raja Adil. Raja Adil ialah adik kepada Raja Melewar, Yamtuan Seri Menanti yang pertama). Syed Shaaban telah mangkat di Keru, Tampin pada tahun 1850.

Pada tahun 1878, Datuk Haji Sahil Undang Rembau yang ke-15 (1871-1883) telah menghantar angkatan perangnya menyerang Tampin yang diperintah oleh Tengku Besar Tampin yang kedua, Syed Abdul Hamid bin Syed Shaaban. Angkatan perang Tengku Besar Tampin yang dipimpin oleh panglimanya yang bernama Memperang Khalifah telah melawan serangan dari Rembau dan berlakulah pertempuran di antara pihak Rembau dengan pihak Tampin di tempat yang bernama Legong, dan banyakkah korban nyawa dan harta benda antara kedua belah pihak. Akhirnya Rembau tidak

dapat mengalahkan Tampin dan angkatan Rembau pun terpaksa berundur.

Tengku Besar Tampin

1. Syed Shaaban bin Syed Ibrahim Al-Qadri
2. Syed Abdul Hamid bin Syed Shaaban Al-Qadri
3. Syed Dewa bin Syed Abdul Hamid Al-Qadri
(Setelah Syed Dewa meninggal dunia, jawatan Tengku Besar Tampin dipangku oleh Tengku Sharifah Leng binti Syed Abdul Hamid kerana Syed Akil bin Syed Dewa, bakal Tengku Besar Tampin belum dewasa).
4. Syed Akil bin Syed Dewa (mangkat ketika masih muda dan tiada meninggalkan waris).
5. Syed Muhammad bin Syed Dewa (mangkat pada tahun 1929)
Dari tahun 1929-1944, jawatan Tengku Besar Tampin dipangku oleh Tengku Sharifah Leng binti Syed Abdul Hamid kerana anak almarhum Syed Muhammad bin Syed Dewa yang bernama Syed Idrus, bakal Tengku Besar Tampin belum dewasa.
6. Syed Idrus bin Syed Muhammad, 1944 — sekarang.